


TEZAU LITURGIC

5 IULIE

**ACATISTUL
SF.CUVIOASE-MUCENIȚE
ELISABETA
TEODOROVNA
DE LA
MOSCOVA
III**



MOSCOVA, 2000



АКАФИСТ В ЧЕСТЬ И ПОХВАЛУ ПРЕПОДОБНОМУЧЕНИЦЫ ВЕЛИКИЯ КНЯГИНИ ЕЛИЗАВЕТЫ И КУПНО С НЕЮ ПОСТРАДАВШИХ СТРАСТОТЕРПЦЕВ АЛАПАЕВСКИХ

Кондак 1

Избранней угоднице Божией,
преподобномученице великой княгине
Елизавете, премудрей и всехвальной невесте
Христовей, яко избавляемии тобою от
искушений и бед, пение благодарственное и
хвалебное восписуем ти молитвенницы твои,
святая страсотерпице царственная. Ты же, яко
имея велие дерзновение ко Всемилосердному
Господу нашему, купно с пострадавшими с
тобою мученики преславными, вознеси молитвы
твоя о всех, величающих вы и взывающих сие:
Радуйтесь, боговенчаннии страсотерпцы
алапаевстии, страны Российския похвало и
всего мира христианскаго украшение.

Икос 1

Ангелов Творец и всея твари Содетель и
Промыслитель во всяцем народе и колене, имеяй
верных чад Своих, от всеславнаго рода
монаршескаго призва тя, святая мати наша

Елизавето, ко служению великому в стране
Российстей; ты бо от дний детства твоего
навыкла еси исполняти волю Господню, и
движимая благодатию Божиею, аки Руфь
древняя, оставила еси народ твой, в земли
Российстей отчизну новую преславно обретше.
Мы же, вся сия ныне славяще, таковыя похвалы
приносим:

Радуйтесь, агницы блаженнии, любовью к Богу
издетска просвещеннии.

Радуйтесь, благодатными дарами Всесвятаго
Духа озареннии.

Радуйтесь, богомудрии князие и мученицы
благословеннии.

Радуйтесь, истинным благородством и
подлинным богомыслием просиявшии.

Радуйтесь, глубину веры и высоту сострадания
всем житием вашим явившии.

Радуйтесь, со Ангелы купно песнь победную
Творцу воспевающи.

Радуйтесь, аки звезды многосветлии на
небосклоне Небеснем сияющи.

Радуйтесь, и нас лучами добродетелей ваших
озаряющи.

Радуйтесь, боговенчаннии страстотерпцы
алапаевстии, страны Российския похвало и
всего мира христианскаго украшение.

Кондак 2

Видевше благолепие лица твоего, святая Елизавето, возрадовася зело благоверный князь Константин, и помышляя о красоте добродетелей твоих, воспе гимны хвалебныя Всеблаговому Господу, возрастившему тя, аки крин среди терний и благодатию Своею преизобильно тя одарившему. Мы же, сие ныне воспоминающе, просим тя, благоверная княгине, приклони и к нам великое милосердие Всемогущаго Творца нашего, да сподобимся и мы купно с тобою во веки пети Ему: Аллилуиа.

Икос 2

Разумом богопросвещенным свыше одаренная, святая благоверная княгине Елизавето, возжадала еси паче всего о еже волю Господню выну исполняти, и, благодатию небесною укрепляемая, взявши крест свой, с кротостию и смирением понесла еси е, за вся Творца благодаряще. По тяжцем же убиении супруга твоего, егда сердце твое пронзи меч обоюдоострый, евангельски возглашала еси «Отче, прости ему, не ведал бо, что сотворил», посещением твоим убийцу супруга твоего к покаянию подвизая. Мы же, вся сия ныне поминающе, просим тя: сотвори купно с иными страстотерпцы алапаевстими молитвы за ны ко Господу Всемогущему, взывающих сие:

Радуйтесь, образ милосердного служения
ближнему явивший.

Радуйтесь, Господа паче всего земного
возлюбивший.

Радуйтесь, образ и подобие Божие в коегождем
человеце зрящий.

Радуйтесь, нелицемерно заповеди Христовы
исполнявший.

Радуйтесь, кающимся грешником слезы
утешительныя посылающий.

Радуйтесь, в несении скорбей и тягот немощныя
укрепляющий.

Радуйтесь, за вся благодарити Христа
научающий.

Радуйтесь, милосердие Божие к нам
приклоняющий.

Радуйтесь, боговенчаннии страстотерпцы
алапаевстии, страны Российския похвало и
всего мира христианскаго украшение.

Кондак 3

Силою благодати Христовыя укрепляемая,
святая благоверная княгине Елизавето, по
кончине супруга твоего, благоверного князя
Сергия, оставила еси мир сей с тленными
благами его, и, отрешся от жития в чертозах
царстех, облеклася еси в ризы иноческия,
воспевая укрепившему тя Господу: Аллилуиа.

Икос 3

Имуще горячее желание послужити ближнему и восходить к Богу по лестнице дел милосердия, вся труды твоя, богоблаженная Елизавето, посвятила еси Всенепорочней Матери Господа нашего, и сего ради пречудный храм Покрова Пресвятыя Богородицы и Приснодевы Марии воздвигла еси в обители твоя. Движимая благодатию Всесвятаго Духа, праведных жен Марфу и Марию, яко святых покровительниц трудолюбия и созерцания избрала еси, в добродетелех своих свято пути их последовавшие. Мы же, светло празднующе святую память твою, мати Елизавето, купно с тобою алапаевстих соратников величаем и взываем вам сице: Радуйтесь, к творению дел добрых всех нас подвизающие.

Радуйтесь, подлинными учениками Христа быти нас научающие.

Радуйтесь, с верою возносимым молитвам радостно внимающие.

Радуйтесь, вся благая прошения наша исполняющие.

Радуйтесь, всего мира христианского украшением явившиеся.

Радуйтесь, следовати пути Марфы и Марии наставляющие.

Радуйтесь, благодать Святаго Духа хранить и

преумножати понуждающих.

Радуйтесь, радостию Христовою души наша наполняющих.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 4

Буря искушений греховных и суеты мирския не возмогла есть поколебати храмины духа твоего, святая мати Елизавето, ты бо, всецело упование на Христа Распятаго возложивше, в трезвении и богомыслии возрастаючи, в царственном граде Москве обитель пречудную основала еси, идеже страждущии людие отраду и утешение обреташа. Сице молим тя: покрый и нас покровом молитв твоих, да воспоем о тебе Всемилосердному Богу нашему: Аллилуиа.

Икос 4

Слышавше богомудрыя советы святаго старца Зосимы, княгине Елизавето, в вере, надежде, любви к Богу и ближним укреплялася еси, и вверенному тебе малому стаду явилася еси воистину наставницею богомудрою и материю вселюбящею, научая сестер обители не токмо словом, паче же образом жития твоего служить страждущим и помощи взыскующим. Сего ради, просим тя купно с алапаевстими мучениками,

да будите и нам стеною крепкою, прибежищем и заступлением в нуждах наших, к вам прибегающим и взывающим сице:

Радуйтесь, диадимы великокняжеския к стопам Спасителя возложившии.

Радуйтесь, Христа Распятаго паче славы царственныя возлюбившии.

Радуйтесь, Крест, аки скипетр, достойно и праведно носившии.

Радуйтесь, истину Божию и правду Христову обретати помогающии.

Радуйтесь, из глубин отчаяния пречудно вызволяющии.

Радуйтесь, бурю печалей духовною радостію разгоняющии.

Радуйтесь, елеем милосердия вашего раны душ наших заживляющии.

Радуйтесь, сироты и вдовицы, немощныя и обездоленныя под покров свой принимающии.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 5

Богоявленная звезда, на небосклоне Церкви Российстей сияющая, воистину явилася еси, святая преподобномученице Елизавето, яко в подвизех монашеских и делех милосердия усердно подвизалася еси; купно со

благоверными великими князьями за веру и Отечество живот твой положила еси и диадемою небесною увенчалася еси. Ныне с новомучениками и исповедниками росстийстими молишися о нас, с любовью пречестную память твою творящих, воспевая Господеви: Аллилуиа.

Икос 5

Видя помощь благодатную, посылаемую по молитвам святых покровителей твоих, преподобного и богоносного отца нашего Сергия Радонежского, златоустаго святителя Петра, митрополита Московского, возлюбленных учениц Христовых, преславных мироносиц Марфы и Марии, царственному пути жития добродетельного свято и праведно последовала еси, богопросвещенная мати наша Елизавето, делание внутреннее с помощью страждущим умело сопрягая, образ служения истинному Богу и ближним тако показуя и венценосных сродник твоих сему научая. Мы же, вся сия ныне поминающе, величаем вас, страстотерпцы алапаевские, и взываем вам сице:

Радуйтесь, царственность вашу не в любоначалии, а в служении державе российстей полагавший.

Радуйтесь, не ради блеска славы земная, а в стяжании сокровищ Небесных подвижающийся.

Радуйтесь, от пристрастия к земным богатствам
больныя души наша врачующии.

Радуйтесь, путие спасительныя нам указующии.

Радуйтесь, в вере истинней нас утверждающии.

Радуйтесь, от дорог погибельных и соблазнов
душетленных нас удаляющии.

Радуйтесь, нести людем истину Христову
подвизающии.

Радуйтесь, внутренний мрак душ наших Светом
Христовым озаряющии.

Радуйтесь, боговенчаннии страстотерпцы
алапаевстии, страны Российския похвало и
всего мира христианскаго украшение.

Кондак 6

Проповедницею милосердныя любве к ближнему
воистину явилася еси, святая мати Елизавето,
ибо обитель твоя бе не токмо тихою пристанию
спасения, обаче и оплотом утешения и
исцеления душ, от страстей изнемогающих.

Твоим бо примером внимая, насельницы
обители твоея скорбящия утешаху, больныя
врачеваху, заблудшия наставляху, умирающия
ко отходу в мир иной преуготовляху. Ты же,
благодарная княгине, видя милосердия такового
торжество, радостно воспевала еси Господеви:
Аллилуиа.

Икос 6

Возсияша на Руси Святей многия угодницы
Божии, от всякаго рода и чина прозябшии, и
теми бо навеки украсися небосклон святыя
Церкви: святители богомудри, преподобнии
отцы и матери наша, подвиги своими Фиваиду
Северную благоукрасившии, праведных мужей
и жен сонм благословенный, образ жития
богоугоднаго нам оставивших, и мучеников
воинство, вкупе с ликом князей благоверных; их
же подвигов подражание и славы достойныя
сонаследницы воистину явистесь вы,
алапаевстии новомученицы, благоверною
княгинею Елизаветою в страданиях
укрепленные. Молитесь ныне купно с
благосветлым собором святых земли нашея о
всех, вопиющих вам сице:

Радуйтесь, царственным путем во обители
Небесныя шествовавшии.

Радуйтесь, к Царице Небесней святыя молитвы
ваша возсылавшии.

Радуйтесь, Отца Небеснаго благосердие к нам
приклоняющии.

Радуйтесь, велии муки в изгнании, Сына Божия
ради, приявшии.

Радуйтесь, стяжати Дары Духа Святаго нас
вразумляющии.

Радуйтесь, Святыни земли нашея свято и

праведно почитати научающийи.

Радуйтеся, уповати на Промысел Божий наставляющийи.

Радуйтеся, в уповании таком преславно нас утверждающийи.

Радуйтеся, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 7

Хотяще некия неблагомысленныя людие оклеветати тя, святая страстотерпице царственная, приидоша в обитель твою, обаче зря святость жития твоего, уразумеша неповинность твою пред людьми российстими, иже и доныне, воспоминая подвизи твоя, умиленно о тебе Господеви воспевают: Аллилуиа.

Икос 7

Новая безбожная власть, не возмогла есть понудити тя, святая благоверная княгине Елизавето, оставить служение твое в церкви Российстей и сестер обители твоея. Заповеди Христовей о любви к ближнему последуя, любы ко Предвечному Господу в сердце твоём сохраняла еси и на благодатную помощь Его во обстояниих скорбных свято уповала еси. Вы же, князи благоверныя, такожде на Господа вся возлагавшии, во след святей Елизавете

мужественно поидоша. Мы же, веру и верность
вашу воспети желая, вопием вам сице:
Радуйтесь, благодатию Божиею во дни скорбных
чудесно утверждениях.
Радуйтесь, клевету и гонения от врагов страны
вашей претерпевшии.
Радуйтесь, за отступивший от Бога и царя народ
российский молившийся.
Радуйтесь, об обращении заблудших присно
Господа умоляющих.
Радуйтесь, от клеветы и ярости людских нас
оберегающих.
Радуйтесь, водою прощения язвы беззаконий
наших омывающи.
Радуйтесь, любовью истинною к ближнему
сердца наша преображающих.
Радуйтесь, любовью ко Христу души наша
наполняющих.
Радуйтесь, боговенчаннии страстотерпцы
алапаевстии, страны Российския похвало и
всего мира христианскаго украшение.

Кондак 8

Странное и страшное крушение империи
российстей созерцая и видя, яко безумнии
людие глумляхуся над боговенчанным государем
Николаем и святым семейством его, егда, аки
вода потече кровь мученик, за правду лютыя
страдания терпящих, вы, святии страстотерпцы,

от рода царскаго прозябшии, на Царя Царствующих и Господа Господствующих все упование ваше возложили есте, купно со слуги верными, воспевая Ему: Аллилуиа.

Икос 8

Всяческия похвалы достойнии бысте, мученицы алапаевстии, егда во времена тяжкия, страну российскую в мрак неверия и ненавидения повергшия, честь и достоинство царское сохранили есте, благовернии угодницы Господни. Ты бо, великая княгине Елизавето, токмо верными сестры обители твоея и святителем Тихоном утешаемая, не возроптала еси, обаче пример благий крепкия веры и любви к ближнему явила еси, егда на третий день Святыя Пасхи, людие вероломныя взяша тя и в темницу ввергоша. Вы же, князие святии Сергие, Иоанне, Игоре, Константине и Владимире, кротце чести лишение, осмеяние и изгнание купно с преподобномученицею Елизаветою претерпели есте. Мы же, вся сия ныне поминающе, величаем вас сице: Радуйтесь, исповедницы и мученицы добропобеднии и преславнии. Радуйтесь, царственнии служителие Всемогущаго Царя Небеснаго прехвальнии. Радуйтесь, Царицы Небесныя чада вернии и возлюбленнии.

Радуйтесь, всемогущую силу благодати Божией познавшие.

Радуйтесь, путем вероотступничества и вероломства не последовавшие.

Радуйтесь, веру Христу и верность монарху своему ничем не запятнавшие.

Радуйтесь, венцы победные и радость вечную стяжавшие.

Радуйтесь, благоверных правителей страны Российския достойнии сонаследницы явившиеся.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 9

Вси чины Ангельския и святых собори, от века Господеви угодившии, с радостию прияша в лик свой умученных в земли россиястей за веру Христову и царя Боговенчаннаго, страстотерпиц добропобедных; купно же с ними и вы, прехвальнии новомученицы алапаевстии: великая княгине Елизавето, князие Сергие, Иоанне, Константине, Игоре и Владимире, со слуги верными Варварою и Феодором, обители сотворшии себе в чертозах Царя Небеснаго, воспевая Ему песнь победную: Аллилуиа.

Икос 9

Вития многовещанныя не возмогут по
достоянию воспети подвиги и страдания ваша,
святии мученицы алапаевстии, яко вы, муки
душевные и телесныя претерпевши, превзошли
есте отроков эфесских, и древним мучеником
Христовым равночестнии воистину явистесь;
купно с новыми страстотерпцы во славе велией
и неизреченней предстоите Царю царствующих
и Господу господствующих, и молитесь о всех
нас, славящих имена ваша и поющих вам
таковая:

Радуйся, святая мати Елизавето, образ
истиннаго милосердия и любви ко Христу
явившая.

Радуйся, святая Варваро, верность наставнице
твоей до конца сохранившая.

Радуйся, святой Сергие, истинныя веры
неустршимый исповедниче, жертву
богоугодную сотворивый.

Радуйся, святой Иоанне, благочестием,
молитвою и страстотерпчеством Богу угодивый.

Радуйся, святой Константине, ризы твоя в
крови агнчей убеливый.

Радуйся, святой Игоре, аки голубь, в обители
Отца Небеснаго, добropобедно воспаривый.

Радуйся, святой Владими́ре, кончину свою
предуведя, младость и живот Господеви

отдавый.

Радуйся, святой Феодоре, купно с царственными мученики за Христа пострадавый.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 10

Спасения вечнаго и венцев нетленных достигли есте, святии мученицы – братия Иоанне, Константине и Игоре, подобно древним отроком Вавилонским, сквозе пещь страданий, в чертоги Царя Небеснаго возшедшии купно со сродники - великим князем Сергием, иже с верным ему Феодором, аки Михаил Черниговский и боярин его Феодор, муки скорбныя ради Христа претерпевшими и князем Владимиром, верность даже до крови отцу земному и Отцу Небесному сохранившим. Ныне же, во славе Престолу Святыя Троицы купно с царем Николаем и иными страстотерпцы предстоите, воспевая песнь ангельскую: Аллилуиа.

Икос 10

Стене нерушимей и адаманту крепчайшему подобна бе вера ваша, добропобедныя мученицы алапаевстии, яко изгнанныя из царствующих градов в глубь земли российския,

богомудрою княгинею Елизаветою наставляемии, пламенными молитвами, постом и трезвением, предуготовляли есте себе к кончине мученичестей. Вы бо, все упование на Христа Распятого полагая, вослед апостолу помышляли есте, яко аще живете, Господеви живете, аще умираете, со Творцем сочетается. Тако убо, благовернии князие Сергие, Иоанне, Игоре, Константине, Владимире купно с верными Варварою и Феодором смиренномудренно на Голгофу вашу востекли есте. Сего ради, мы таковые похвалы умиленно вам приносим:

Радуйтесь, багряницы царственные на белыя ризы мученическия сменившии.

Радуйтесь, глубину страданий, от чести лишения безбожниками, претерпевшии.

Радуйтесь, высотой славы и венцами нетленными сего ради Христом увенчанныи.

Радуйтесь, аки звезды многосветлыя на небосклоне Церкви российстей возсиявшии.

Радуйтесь, о мире всего мира Творца неустанно умоляющи.

Радуйтесь, милосердие Божие к нам приклоняющи.

Радуйтесь, о спасении нашем Сына Божия усердно умоляющи.

Радуйтесь, дары Всесвятаго Духа стяжати

помагающих.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 11

Пение умиленное возносили есте Творцу всяческих, прехвальнии мученицы царственнии, егда нощию, аки татей, бесонравныя богоборцы, тайно увезоша вы из града Алапаевска и в пустынный кладезь ввергоша. Вы же, муки лютыя претерпевая, не возроптали есте и, подобно орлам небопарным, чистыми душами вашими вознеслися есте в чертози Царя Небеснаго, идеже великою и неизреченною славою увенчаннии воспеваете Всесвятей Троице ангельское пение: Аллилуиа.

Икос 11

Светильницы Божии, благодатию Святаго Духа возжженнии, воистину явились есте, добропобеднии мученицы алапаевстии, ибо с высоты власти и славы низвергнутии, святою княгинею Елизаветою наученнии, возгласили есте: «Слава Богу за вся!» и на Голгофу свою взошли есте, постом и усердными молитвами к смерти лютой ся предуготовивши. Мы же, видяще добрая дела ваша, прославляем прославльшаго вас Господа, и к вам от всего

сердца вопием:

Радуйтесь, светом вашим нашу тьму греховную разгоняющий.

Радуйтесь, теплотою любви ваша сердца наша хладная согревающий.

Радуйтесь, облаком благодати Божией от зноя житейского нас покрывающий.

Радуйтесь, палимая зноем страстей, души наша прохлаждающий.

Радуйтесь, об утверждении в России веры истинныя Творца умоляющий.

Радуйтесь, любить и творить волю Божию нас научающий.

Радуйтесь, недужи телесныя и скорби душевныя исцеляющий.

Радуйтесь, отраду и утешение нам ниспосылающий.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 12

Благодатию в горниле скорбей и тягчайших испытаний очищеннии, богоноснии страстотерпцы алапаевстии, купно со сродники вашими, боговенчанном царем Николаем, царицею Александрою, великими царевнами Ольгою, Татианою, Мариею и Анастасиею, цесаревичем Алексием, благоверными великими

князьями Павлом, Димитрием, Георгием, Николаем и со слугами верными, Всемогущаго Бога нашего умоляете, от скорбей, недугов и суеты нас свободждаете, от враг видимых и невидимых исхищаете и подвизаете радостно Творцу о вас воспевати: Аллилуиа.

Икос 12

Воспевая преславное житие ваше, святии и всехвальнии новомученицы алапаевстии, величаем вас, добропобедныя подвизи ваша хвалим, яко дерзновенно Христа пред богоборцы исповедали есте и верность Ему чрез скорби, лишения и страдания пронесли есте, стяжавше благодать молиться за ны, вопиющия вам сице: Радуйтесь, земли Уральския похвало и утверждение.

Радуйтесь, всея страны Российския драгоценное украшение.

Радуйтесь, всего мира христианскаго добропобедное утверждение.

Радуйтесь, сомневающихся и маловерных благодатное вразумление.

Радуйтесь, купно со всеми новомученики на пиру Агнчем присно торжествующии.

Радуйтесь, купно с древними страстотерпцы Христу гимны хвалебныя воспевающии.

Радуйтесь, купно с благоверными царями и князьями Царя Небеснаго величающии.

Радуйтесь, радостью духовною унылыя сердца наша преображающие.

Радуйтесь, боговенчаннии страстотерпцы алапаевстии, страны Российския похвало и всего мира христианскаго украшение.

Кондак 13

О, всехвальнии и достопочтеннии новомученицы Алапаевстии, смиренно просим вы, примите милостивно убогия сия похвалы, возносимыя нами благочестиваго жития и мученическаго кончины вашей ради и молим вас: умолите убо Превечнаго Бога нашего, во Святей Троице Единого, да избавимся обстояний тягостных, во уныние нас повергающих и да сподобимся купно с вами и всеми новомученики и исповедники Российстими во веки Всемогущему и Всемилосердному Господу воспевати: Аллилуиа. Аллилуиа. Аллилуиа.



ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДНИЦЕ
АРХАНГЕЛАМ
И АНГЕЛАМ

†

ИЮСКЕ
*НЕБЪ